

Broj: SI 3 Iž 030632 18 Iž
Sarajevo, 04.10.2018. godine

Sud Bosne i Hercegovine u Sarajevu, u apelacionom upravnom vijeću sastavljenom od sudija, Mirsade Džindo, predsjednika vijeća, Dinke Bešlagić-Čovrk i Zvezdane Antonović, članova vijeća, odlučujući o žalbi Udruge „Hrvatska zvona“ Široki Brijeg, ul. Fra Didaka Buntića br. 74, Široki Brijeg, izjavljenoj protiv odluke Centralne izborne komisije Bosne i Hercegovine, broj: 06-1-07-1-378/18 od 28.09.2018. godine, u pravnoj stvari zahtjeva za akreditiranje za posmatranje rada na biračkim mjestima, u nejavnoj sjednici održanoj dana 04.10.2018. godine, donio je

RJEŠENJE

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je zahtjev Udruge „Hrvatska Zvona“ za posmatranje Općih izbora 2018. Godine u Bosni i Hercegovini i to za posmatranje rada na biračkim mjestima u osnovnim izbornim jedinicama Široki Brijeg, Posušje i Prozor-Rama.

U blagovremenom roku Udruga „Hrvatska zvona“ je uložila žalbu osporavajući predmetnu odluku CIK-a BiH.

U žalbi navodi da je odluka diskriminatorna koja se ogleda u tome što sve političke stranke koje imaju kandidate na izborima imaju posmatrača ili čak svoje predstavnike u biračkim odborima a posebno imajući u vidu da se akreditacija odnosi na izborne jedinice Široki Brijeg i Posušje gdje Marko Tokić nije kandidat, pa time ne bi mogli imati uticaj na rezultate u Kantonu 7.

Stoga predlaže da se pobijana odluka CIK-a BiH ukine te predmet vrati na ponovni postupak.

Centralna izborna komisija BiH je u odgovoru na žalbu predložila da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije Bosne i Hercegovine kojom je odbijen je zahtjev Udruge „ Hrvatska Zvona“ za posmatranje Općih izbora 2018. Godine u Bosni i Hercegovini i to za posmatranje rada na biračkim mjestima u osnovnim izbornim jedinicama Široki Brijeg, Posušje i Prozor-Rama.

Naime, u konkretnom slučaju odredbom člana 17.4 stva (2) Izbornog zakona BiH jasno je propisano u kojim slučajevima se neće izdati akreditacija takvom udruženju. To su dva slučaja: da je udruženje građana osnovano i da ga sponzoriše ovjerena politička stranka i drugi, da je udruženje uključeno u bilo kakve aktivnosti u ime ovjerene političke stranke.

Iz dokumentacije u predmetu nepsorno proizilazi da je Udruga” Hrvatska zvona” upisana u registar udruga Ministarstva pravosuđa i uprave Županije Zapadnohercegovačke 19.06. 2017. godine i da je predstavlja i zastupa Marko Tokić predsjednik Udruge. Da je Odlukom CIK BiH od 19.07.2018. godine ovjerena kandidatska lista i kandidati političkog subjekta Hrvatska Republikanska stranka za učestvovanje na Općim izborima 2018. godine na kojoj se ispred naveden stranke nalazi za izbornu jedinicu Skupštinu Kantona 7 u Federaciji BiH kao kandidat Marko Tokić.

U ovom slučaju odbijena je akreditacija zbog toga što je udruženje time što je predsjednik Udruge Marko Tokić ovjereni kandidat političke stranke Hrvatska republikanska stranka za učešće na Općim izborima 2018. Godine za Skupštinu Kantona 7, pa je nesporna relevantna činjenica da je na taj način Udruga “Hrvatska zvona” uključena u aktivnosti političke stranke Hrvatska republikanska stranka.

Nije od uticaja činjenica da se akreditacija za posmatrača odnosi na izborne jedinice gdje Marko Tokić nije kandidat kod izričite citirane zakonske odredbe kojom se ne dozvoljava bilo kakva aktivnost u ime ovjerene političke stranke.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.

**PREDSJEDNIK VIJEĆA
S U D I J A
Mirsada Džindo**

